

Uunga siunnersuut: Kalaallit Nunaannut, Kalaallit Nunaanniit aamma Kalaallit Nunaanni usinik imaatigut assartuussineq pillugu Inatsisartut inatsisaat
(Peqqissutsimut Angallannermullu Naalakkersuisoq)

Saqqummiussissut

(Peqqissutsimut Attaveqarnermullu Naalakkersuisoq)

Siullermeerneqarnera

Matumuuna Kalaallit Nunaannut, Kalaallit Nunaanniit aamma Kalaallit Nunaanni usinik imaatigut assartuussineq pillugu Inatsisartut inatsisissaattut siunnersuut, Kalaallit Nunaannut, Kalaallit Nunaanniit aamma Kalaallit Nunaanni nassiussanik imaatigut assartuussineq pillugu Inatsisartut peqqussutaannut atuuttumut taartaasussaq saqqummiunneqarpoq.

Aningaasaliinermut akiliutip akilersinneqartarneranut ullumikkut inatsisitigut tunngavigineqartup Aningaasanut Inatsimmiit imaatigut assartuussinermut inatsimmut nuunneqartariaqarnera, inatsisissatut siunnersuutip saqqummiunneqarneranut tunngavigineqarpoq. Aningaasaliinermut akiliut 2011-mi atuutsinneqalerpoq, umiarsuarnullu nunaqarfiliartaatinut nutaanut siunissami ukiorpassuarni nunaqarfitsinnik isorliunerusunillu pilersuisuusussanut aningaasalersuinermut tapertarinqassalluni. Tassalu erseqqissassallugu pingaaruteqarpoq, inatsisip matuma akuerineqarnerani akitsuummik nutaamik atuutsitsilernissaq *pineqanngimmat*. Taanna akitsuummumut pioreersumut inatsisitigut tunngaviummik nuussinerinnaavoq.

Umiarsuarnut nutaanut aningaasaliinissaq siunertaralugu aningaasaliinermut akiliut 2011-mili akilersinneqartarpoq. Umiarsualiorfiup akiliisinnaajunnaarnerata kinguneranik umiarsuit tunniunneqarnissaat kinguattooraluartoq aningaasaliinermut akiliutip akilersinneqartarnera ingerlaannarpoq.

Aningaasaliinermut akiliut 2011-miit 2014-imut annerpaamik 15,78 mio.kr.-ussaaq, 2015-imiillu akiliut Royal Arctic Bygdeservice annerpaamik 2 %-imik sinneqartooruteqartussanngorlugu aalajangerneqassalluni.

Royal Arctic Bygdeservice A/S-imut ukiunut tallimanut missingersuineq malillugu aningaasaliinermut akiliut piffissami 2015-2019-imi ukiumut 6,33 %-inik annertussuseqartussaassasoq naatsorsuutigineqarpoq. Kisiannili 2014-imi aningaasaliinermut akiliummi 16 mio. koruunit missaanniittut ileqqaarneqassapput, pissutigalugu umiarsuit nunaqarfiliartaatit aatsaat 2015-ip ingerlanerani angalanermut pilersaarummi ikkunneqartussaammata. 2014-imut aningaasaliinermut akiliummi ileqqaakkat, 2015-imi aningaasaliinermut akiliummut akigititap 3,1 %-imiitiinnarnissaanut 13,8 mio. koruunit atorneqassapput.

2016-imiit aningaasaliinermut akiliut qanoq pineqassanersoq oqaatigissallugu suli siusippallaarpoq. Akigititap sapinngisamik appasinnerpaamiitinnissaa Naalakkersuisut siunnerfigaat. Tamanna ilaatigut usit assartorneqartut amerliartorneranni imaluunniit allatigut Royal Arctic Bygdeservice A/S-ip aningaasaliiffigineqarneratigut,

sunniuteqarnerulersitsinerup malitsigisaanik pisinnaavoq, assersuutigalugu sullissinermut akiliutip qaffatsinneratigut.

Aningaasaliinermut akiliummut inatsisitigut tunngaviusumik nuussinermup saniatigut, inatsisip kukkunersiorneqarneranut atatillugu Inatsisartut peqqussutaanut atuuttumut naleqqiullugu oqaatsinut tunngasunik arlalinnik iluarsiiisoqarpoq. Kiisalu ingerlatsinissamut akuersissummut, ullumikkut Royal Arctic Line A/S-ip pigisaanut inatsisitigut tunngaviusut misissorneqarput. Ingerlatsinissamut akuersissut Kalaallit Nunaannut aamma Kalaallit Nunaanniit, kiisalu Kalaallit Nunaanni ornigassat arlallit akornanni usinik assartuussinissamut ingerlatseqatigiiffimmut kisermaassisussaataaffiliivoq. Royal Arctic Line unammillerteqarani illoqarfinnut usinik arlalippassuarnik nassiussiffiusartunut angallassisinnaammat, kisermaassisussaataaneq arlalinnik iluaqutissartaqarpoq. Paarlattuanilli akornutissartaasut arlaqarput, ingerlatseqatigiiffiup ornigassat amerlasuut, angallavigissallugit aningaasaqarnikkut iluanaaruteqarfigisinnaanngisani pilersussallugit pisussaaffigimmagu.

Ingerlatsinissamut akuersissummut isumaqatigiissutip annertuunik allannguuteqartinneqarnissaa tunngavissaqanngitsoq, Assartuussineq pillugu Isumalioqatigiissitaq ingerlatsinissamut akuersissummik misissueqqissaarnermini naliliivoq. Tassani pilersuinerup qularnaatsuunissaa innersuussutigineqarpoq. Naalakkersuisut taamatut naliliinermut isumaqataapput. Kisiannili ingerlatsinissamut akuersissummut isumaqatigiissut ukiuni 20-ni atuuttussaavoq, taamaattumillu Naalakkersuisut isumaqarput akuersissutip misissoqqissaarnissaa naapertuutissasoq. Ersarinnerulersitsinissaq siunertaralugu siunissami akuersissutip nalunaarutitut ilusilerlugu tunniunneqartarnissaa inatsisissatut siunnersuummi siunnerfigineqarpoq. Allanguinerup kingunerisaanik Naalakkersuisut nalunaarummik nutaamik, Kalaallit Nunaannut, Kalaallit Nunaanniit aamma Kalaallit Nunaanni imaatigut angallassisinnaatitaanermut tunngasumik suliaqarlutik aallartissapput.

Naatsumik oqaatigalugu inatsisissatut siunnersuut saqqummiunneqartoq aqcutigalugu allannguinnissaq Naalakkersuisunit siunnerfigineqanngilaq, taamaallaalli suleriaatsinik atuuttunik iluarsinissaq pineqarluni.

Taamatut oqaaseqarlunga Kalaallit Nunaannut, Kalaallit Nunaanniit aamma Kalaallit Nunaanni usinik imaatigut assartuussineq pillugu Inatsisartut inatsisissaattut siunnersuut Inatsisartuni kajumittumik suliaassanngorlugu tunniuppara.